

SIARAN MEDIA

KLINIK SUBFERTILITI LPPKN PULAU PINANG BERI HARAPAN KEPADA PASANGAN DAPATKAN ZURIAT

BERTAM, 29 MEI – Pengoperasian Klinik Subfertiliti Lembaga Penduduk dan Pembangunan Keluarga Negara (LPPKN) Pulau Pinang sejak Julai 2021 dilihat mampu memberi harapan kepada pasangan di negeri itu dan kawasan sekitar zon utara untuk mendapat zuriat.

Timbalan Menteri Pembangunan Wanita, Keluarga dan Masyarakat, Hajah Aiman Athirah Bt Sabu dalam ucapan perasmian Seminar Kesihatan Kesejahteraan Wanita yang diadakan bersempena Sambutan Hari Ibu berkata, statistik Subfertiliti LPPKN Pulau Pinang hingga 26 Mei 2023 menunjukkan sebanyak 878 kes baru dan ulangan telah didaftarkan.

"Daripada jumlah tersebut, sebanyak 94 kes telah menjalani kaedah rawatan subfertiliti yang ditawarkan dan 12 kes atau 13% berjaya hamil. Sehingga hari ini, empat orang bayi telah selamat dilahirkan hasil rawatan pusat ini," tambah beliau.

Sebagai makluman, selain Klinik Subfertiliti LPPKN di Bertam, Pulau Pinang, LPPKN turut menyediakan perkhidmatan di dua (2) buah Pusat Subfertiliti iaitu masing-masing di Kuala Lumpur (Ibu Pejabat) dan di LPPKN Johor Bahru, Johor.

Dalam tempoh 10 tahun iaitu daripada tahun 2012 hingga 2022, data keseluruhan Pusat Subfertility LPPKN mencatatkan sejumlah 13,846 kes baru telah didaftarkan. Manakala 65,457 kes didaftarkan sebagai kes ulangan menjadikan keseluruhan berjumlah 79,303 kes.

Dalam ucapan sama, Hajah Aiman turut menggesa wanita negeri itu untuk kekal menjaga kesihatan dan merebut peluang menjalani ujian saringan pencegahan kanser payudara dan pangkal rahim melalui kaedah ujian mamogram dan HPV DNA yang ditawarkan secara percuma di semua 49 buah Klinik Nur Sejahtera LPPKN seluruh negara.

####

Disediakan oleh:

UNIT PENERANGAN DAN PENDIDIKAN

Lembaga Penduduk dan Pembangunan Keluarga Negara (LPPKN) P.Pinang

(Wan Nur Azlina Bt Wan Abdul Rahman -0136914485